

四庫全書

史部

欽定四庫全書

史部

山西通志卷二十六

詳校官監察御史臣查善長

檢討臣德生覆勘

總校官進士臣朱鈐

校對官編修臣勵守謙

謄錄監生臣蔣繼熊

欽定四庫全書

山西通志卷二十六

山川十

忻州

繫舟山在州南三十五里靈記五臺山有四埵各去臺  
百二十里南繫舟山號為南埵上有銅環鐵軸昔帝  
堯遇水繫舟於此土人謂禹治水繫舟有石如環軸  
曰繫舟鬼一名小五臺下有薛雲谷金元德明隱誦

東巖趙秉文改曰讀書山 趙秉文繫舟山圖詩山  
頭佛屋三五間山勢相連石嶺關名字不經從我改  
便稱元子讀書山 楊慥元德明墓誌居東山福田  
精舍首尾十五年東崑其自號也 元好問赤石谷  
詩南臺說有金銀氣可是并汾處士星詩注繫舟山  
僧徒謂之小五臺九月中時有景星如佛光云

陀羅山在州西北五十五里怪石凌空懸崖欲墜有文  
殊足跡又有清涼石香爐石滴水巖青龍池元好問

有詩

程侯山在州北四十里一名金山山半西南有采金穴  
石綠洞 金山綠洞一作六洞一在李家長山二在  
部落三在張家山南北相傳產礦 五朝志秀容有

程侯山繫舟山有嵐水 九域志程侯山趙地 山

經忻水東歷程侯山下舊有采金穴故謂之金山

山堂肆考程侯山在山西忻州程嬰匿趙孤於此

元好問詩攢青疊翠幾何般玉鏡修眉十二鬟常

着一峰烟雨裏苦才多思是金山

七峰山在州東二十五里廣峪山東有七峰上人名筆  
架山上有龍王寨絕險

虎頭山有二一在州東二十五里遊邀村南一在州西  
北六十里高村北以形似名兩山對峙胥山之磊落  
者

石梯山在州東南十八里山北有馬井恒滿

廣峪山在州東南二十五里內有石崖廣三丈祠廣堂

神即尹鐸也禱雨多應下有廣峪泉

胡璋崖在城東南古志南宋民胡璋倦臥夢神遣雨雹於東鄉璋盡拔溝草覆之同輩徃視如夢因名臥所曰胡璋崖

白雲洞在繫舟山東南土人名乾石窰有文殊像禱雨置盞像前巖水滴盞中輒雨

鳳凰山有二一附繫舟山其後連山倏突土人名鳳凰臺一在州北四十里皆以形似名

石嶺關山在州南四十里東連繫舟山

獨擔山在州西南二十里相傳產玉芝雲母石有穴一

名雲母穴水經北俗謂雲母為土丹訛為獨擔 唐

貞觀中命薛遵度採雲母封山神為靈顯王碑存山

巔半巖

前獨擔山在獨擔山南七里舊名後獨擔山有玉泉

陰山在州西南四十里牧莊西夏月凝冰積雪

三鬼山在州西南五十里山麓有香泉寺



赤塘谷在州西南五十里白馬山之谷也五代劉赤塘  
隱此

白馬山在州西南六十里北連大嶺山西南界靜樂山  
峰羣立牧馬河源此 山海經山陽產玉石陰產銅

鐵

按今孟縣白  
馬山產鐵

九龍岡在州西一名九原岡仞有九 元好問募修學  
疏華表俯窺於雙鶴連岡雄鎮於九龍又天慶觀記  
吾州跨西岡而城岡占城之半是謂九龍之原檀弓

志晉大夫之墓直謂之九原水經謂滹沱經九原城北流此其地也岡勢突起下瞰井邑故以廟學道觀佛寺鎮之

石姑山在州西二十五里相傳石氏處女修浮屠法寂於此上建廟

落霧山在州西六十里一名羅霧山相傳落霧則有仙馬鞍山連落霧山

清水山亦與落霧山連

五峰山在州西七十里陀羅山之西平原五石峰屹立如指胥絕險

兩截山在州西北二十里烏雲分綴

龍首峰在州西北二十里北趙村前有龍池

鍾乳山在州西北四十里兩阜對峙一名雙乳山

浮屠山在州西北四十五里溫村與龍池梁石佛喞相連西南有白龍頭兩崖石窰南有大溝泉北有一滴

泉

龍門山在州西北五十里南連陀羅山一名白雲山

夾如門

雲中山在州西北八十里連雙尖山北界崞縣

產黃苓  
茯苓菜

東下有谷雲中水經此

明一統志雲中  
水所未覈

雙尖山在州西北八十里雲中河源此一名岱嶽殿山

大嶺山在州西北百里北連崞縣黃嵬山西界靜樂一

名家寶山又名大小嶺山

產黃苓  
茯苓

魏安同欲修大嶺

道以通天門關 王儼陳盟神道碑拜山西右布政

使築忻口城除道通平西嶺

石綠洞在州西北金山深不可測昔有持炬入者及洞  
半聞流水見隔水石門乃返

白蛇山在州北五十里

忻口諸山在州北五十五里忻水即沙河也發源崞縣  
南流入州境隋因以名郡口為郡北要害故名 土

地記漢高祖出平城圍還師次於此六軍忻然故名  
州志駁之 晉高祖遣供奉官張澄以兵二千搜索

并鎮忻代山谷中吐渾悉驅出塞

玉箭崖在忻口北東岸土人名將軍背

蝦蟆石在忻口北東岸以形似名諺曰水滄蝦蟆石水

湮正定府

石蛇山在州北白村以形似名

馥香山有寶香寺

大羅山

石谷山

赤石谷 元好問詩山近清涼覺地靈

仙人洞在福田寺左產瑪瑙石相傳通平山縣

屠岸賈洞在劉家溝相傳通定襄古城

薛雲谷五代時薛雲隱此

滹沱水在州東北五十五里繇崞縣東南流合沙河入

州境忻口鎮東經白村高村金山鋪又東流入定襄

境

牧馬河在州南五里源出陽曲界白馬山西南流入州

境合石代橋溝水又合嵐水經白石村折而東流經城南七里又東北經定襄入滹沱河

南河出石佛岬經南營屯入雲中河

馬井平泉在南泉玉泉山北昔有馬食禾遂之不見掘之得水溢與地平遂名馬井

香泉在州西南五十里三鬼山麓泉甘

金水河出九龍岡西麓流經會立解原村東北入雲中河後淺



三澗溝在州西五里舊志名美良川

澗溝泉出石姑山半經喬村入流江後澗

石代橋溝在州西百二十里入牧馬河

嵐水源自西山北流入牧馬河 通典秀容有嵐水

一滴泉在浮屠山北合流東南入雲中河

大溝泉在浮屠山南

賀兒溝在北門外迤西溝洞深邃相傳嬰杵謀易孤地  
雲中河在州北七十里出雙尖山鬚髻尖合流經橫河

雲內口南流經州北三十里又東北入定襄境會牧  
馬水入滹沱河 水經雲內鎮入肆樓城之西東流  
兩截山故肆州一名肆慮川一名肆樓川又名忻水  
魏太和五年三月辛酉朔車駕幸肆州癸亥講武  
於雲水之陽

龍池在北趙村龍首峰前相傳濬池輒微雨

沙河源出崞縣經忻口東入滹沱河 通考唐復分置

忻州以忻川水名又云秀容有雲母山忻川水藍水

肆慮川水

洛陰水發源閘溝米家溝柳林溝合流經麻會鎮東南  
北流入牧馬河與水經注洛陰水異

綠水泉在雙堡北東流入牧馬河

合索河出合索村南二里 山海經因鵠索於此故山  
與河皆得名焉

廣峪泉出廣峪山

寒泉在雙堡後涸

前山泉出南營屯東南入雲中河

海滿泉出嘉禾南入雲中河

清水溝泉渾水溝泉與大溝泉皆出流江南後涸

車輪泉

定襄縣

劉仙洞在縣東南三十里遼燕山廣陵劉操鎮守孟州  
口遇呂祖遂更名海入山洞修煉後化鶴飛去即今  
道教南宗之祖也

神山在縣東北十五里表延二里遞高半里平原壘石  
突兀如盤疑有所遺而成金元好問嘗讀書於此因  
號遺山詩曰一丘一壑真堪老且向神山烟景休上  
有古剎霜擔鐵壁傳納海記定襄山由東北來羣  
峰連絡若馳若突至牧溪之東勢若少駐而後南逾  
溪而西有山曰神山發地峭豎孤立平野故名或又  
以為羣山之遺也又名遺山山之陰滹沱橫蕩而東  
山之陽牧水環滙而入于滹沱山川佳勝處也

武子谷山在縣東二十里東西亘五里漈高三里連五石峪山峰巒高峻一名五子谷

五石峪山在縣東二十里南北袤三里漈高三里連十八盤山雲合則雨

十八盤山在縣東三十里南北袤五里連牛臺山漈高五里盤旋而上十八轉

琵琶山在縣東南十五里東西亘五里漈高二里連紅砂山形似琵琶

閉門峪在縣東南十五里一山中分相對如門

紅沙山在縣東南十五里東西亘三里遞高二里連五

峪山山沙胥紅

武峪山在縣東南十五里東西亘四里有竒遞高三里

連熊兒水山相傳有藏孤臺

七巖山在縣東南十八里東西亘三里遞高二里連八

峰尖山石洞七中洞尤竒深二十丈有竒廣殺三之

一高二丈有竒形覆而四垂夏旱滴水如散珠不絕

後一井巨容斗滴水長注不盈不竭禱雨輒應明知縣王立愛名曰惠泉井上小巖名惠泉第一洞天右有獅石巖北有寶符巖山一名七崖

居士山在縣東南二十五里東西亘三里連高二里連窟頭山流泉側有石室唐王維兄弟讀書於此石室碑魏武定四年十月任城王居士室歐陽修集古錄跋曰魏宗室封任城王者數人其國中絕不知武定中封任城王者何人也



蜜頭山在縣東南二十五里東西亘四里遙高四里連

團城山上有羊腸占

山產石炭

團城山在縣東南二十五里東西亘一里遙高二里連  
七巖山相傳趙盾令軍士築城止宿焉

八峰尖山在縣東南三十里東西亘十里遙高五里連  
琵琶山一山八峰

熊兒水山在縣東南三十里東西亘三里遙高二里連  
暖窰山熊嘗入山水隨湧出故名

暖窰山在縣東南四十里東西亘七里遞高五里連五子谷山氣常暖

叢蒙山在縣南二十五里東西亘六里遞高五里連居士山羣峰聯絡山尤聳峙春夏雲合則雨有雨霽侯廟一名叢象山山下有泉三穴流合為一名三會泉紅泉山在縣西南三十里東西亘六里遞高三里連叢蒙山洞石紅似硃砂泉源不絕

虎頭山在縣西南三十五里東西亘五里遞高二里連

紅泉山西接石嶺關以形似名

橫山在縣西北三十里東西亘三里逶高二里連鳳凰山衆山東西山獨南北元好問詩橫山猶帶鳳凰形

鳳凰山在縣西北三十里

龍頭山在縣西北三十五里東西亘二里逶高二里西接忻口連忻州界猫寨山滹沱水經其旁對水西忻口鎮麓有暖泉

栢樹嶺在縣北三十里滹沱河北東西亘五里遞高三里連鐵石山一名漆郎山山洞中鑿漆郎像乃豫讓漆身地也洞外石有足跡馬蹄跡

鐵石山在縣北三十里東西亘三里遞高二里連大小龍山石重而黑能吸鐵

大小龍山在縣北三十里東西亘三里遞高二里連臥虎山

臥虎山在縣北三十里東西亘三里遞高二里連趙老

懷山縣志叢蒙山峙其南臥虎山踞其北東枕牛臺  
西拱藍阜牧馬水前縈滹沱水後繞

趙老懷山在縣北三十里東西亘二里遞高一里有奇

連橫山

聖阜山在縣東北二十里五臺縣西南三十八里袤延  
二里遞高半里二山對峙峻聳孤秀下有釣魚臺五  
仙洞仙人手足石又有溫泉蓮花池 水經滹沱水  
東流聖人阜北 山堂肆考聖阜山在定襄縣西北

其山孤峙石上有二足跡 元好問詩馬水橫陳聖  
阜前滹沱陂堰遠相連

龍母洞在縣東北三十里洞口劣三尺行三四十武始  
敞豁有龍母像古臺石磴後一石穴尤邃實禱雨以  
獲水漬香為驗

牛臺山在縣東北三十里南北袤十里遮高三里連五  
公山元里人李子敬避居地時號李牛臺

石佛洞在縣東北三十五里開石洞天造石佛

紫石山在縣東北三十五里南北袤五里遞高三里東  
北接五臺界

五公山在縣東北四十里南北袤二十里遞高四五里  
連段木山相傳五仙煉丹於此

段木山在縣東北四十里南北袤九里遞高四里連青  
石山接五臺大關

青石山在縣東北四十里南北袤五里遞高三里連紫  
石山

關門山地形志定襄有關門山

滹沱水經崞縣至忻州忻口鎮東折入縣境橫北東流  
後繞縣治如帶又東北流合雲中河水繇上湯頭經  
五臺縣大關隸縣境凡七十里又東入直隸正定府  
界

甘泉井在小南門外水甘相傳趙襄子鑿

三會泉在叢蒙山麓一龍液泉一呂布池一娘娘池竝  
出合流四時不涸溉灌稻田為太原晉水之亞



牧馬河發源忻州西南白馬山至牛尾莊合諸水出州境東流入縣境智村南環縣治如帶東北至衛村入滹沱河 水經白馬之山牧水出焉

雲中水繇安義藍臺西營羊房村東北入滹沱河土人名天章河 牧馬雲中源分二水一說雲中水乃牧馬河之支派也

惠民井在西門外

暖泉在龍頭山麓夏涼冬暖

溫泉在聖阜山下有三穴長流唐龍朔中嘗賜錦幡幢  
蓋舊有李治碑記

馬城池宋元豐四年三司戶部副使陳安石增收忻州  
陂地鑿戶馬城池鹽夾硝味苦

馬跑泉 柳鉢泉 東凹泉

靜樂縣

孝文山在婁煩鎮西南距縣八十里坐鎮婁煩交城永  
寧間蘆芽山迤支當宗管涔孝文矣相傳魏孝文帝

巡狩至此上有廟

周洪山在石峽外婁煩鎮西距縣七十里高十里盤踞  
八十里亦劈脈於赤堅嶺而東北上者山面南形巍  
莪竒特西北十里有渥洼泉山一名周公相傳宇文  
周巡狩至此

蘆芽山在縣西北百五十里汾水西竒嵐州五寨縣之  
界也

管涔山在縣東北百六十里寧武縣之界也

岑山一名岑峰山乃汾礮交匯間也山在城東五十步  
盤踞八十里城東北隅跨巒之上山面南南麓在城  
內北麓在城外

愚山在東門外五里邑李模有愚山記

娘娘山在縣東十五里高一里盤踞三十里繇巾字山  
來而至東川之北山面南三四峰秀聳如列筍山下  
有溫泉即礮水也

四稜山在縣東二十五里繇兩嶺盤曲而至東川之南

山北懸崖上有鷓兒崖石洞繇鳥道跋山一里上石  
磴數丈迺入洞

桃子山在縣東五十里繇兩嶺來有泉一泓禱雨多應  
宋崇寧間賜號靈濟之神加封昭潤公宣和初建祠  
兩嶺山在縣東六十五里迤高五里盤踞四十里乃管  
涔山東北枝轉南折北之兩脊也兩山相對面北北  
嶺面東南

懸鐘山在縣東七十里從巾字山來形似鐘頂圓淨光

麗實胥石也上有石寨名馬寨

閤雷山在縣東南六十里繇兩嶺來土人傳時聞雷起

云

羅漢山在縣東南七十里繇兩嶺來高聳入雲中有洞

乳石特奇

天柱山在縣南碾河外高一里盤踞十里乃蘆芽泉出  
枝環迴而至止者也山面南半崖一泉名天柱龍泉  
一名犬舐泉旁有廟肖爾朱榮像稱明惠王以榮為

天柱大將軍也明一統志榮嘗過此

桃山在縣南四十里有泉一泓宋宣和初建廟其上

石峽山在縣南六十里兩山對峙汾水穿流其左繇兩嶺來其右繇鹿徑南至赤堅嶺遠來胥祖蘆芽而至止者也峽中多泉匯流二十里入汾水胥溫不冰

水經注汾水又南與東西溫谿合水出右近谿聲流翼注水上雜樹交陰雲垂烟接自是水流潭漲波濤轉泛相傳屈產乘即此晉嘗產龍馬容或有之若

明一統志廣輿記所載晉假道於虞出此則謬矣

擔嶺山在縣南六十里

臨春山在縣南百二十里石樓東南之天城村高百丈  
下有流泉繇雁門村入汾

花果山在縣南百二十里

紫石山在縣南百四十里膩石可作硯

黃家莊洞在縣南汾水西黃家莊入溝深三里山谷旋  
轉成窩東南西三面脊上而北山獨石壁數十仞上



穿四洞

石門山在縣西南百里婁煩鎮西二十五里石似門

龍和山在縣西南百二十里婁煩鎮西三十里左引周

洪右接孝文峭壁削拔瑞雲時遠似龍象云

石樓山在縣西南百三十里根於孝文而東北上者上有黑石如樓巔有泉一名獨泉山

石龍山在縣西南百五十里雁門村道中石似龍形鱗爪鬚毫宛肖一名夾龍山

白刁嶺山在縣西南百五十里盤踞於孝文而東北上者

黑風山在縣西五里汾水西高三里盤踞四十里乃蘆芽西出枝遶迴而至止者也山面南側有一竅秋冬出黑氣名風洞山上有風神祠

鹿徑嶺山在縣西六十里乃蘆芽西出枝南度者也一名鹿綻嶺歐陽修劄子經惠州飛鳶軍入洪谷方至奇嵐即今鹿徑嶺道也

鳳凰山在縣北四十里

馬頭山在縣北五十里汾水東萬華出枝遶西者金天會中建後魏孝文帝廟

陽光洞在北山麓天慶觀後宋杜時亮記天慶觀依北山之麓循三清殿而北上徑路盤紆約二百步至山脇當峻壁巉巖處為洞鑿深三丈有奇高廣尋仞入洞門西折又為石梯高丈許陟之然後達洞之奧屹嵯山在縣東北六十里北接刁胡山西通磨官峪

磨官峪在屹嵯山西

雕狐山在縣東北八十里上多雕狐路繇磨官峪入

黃菜山在縣東北八十里遞高三里盤踞九十里連寧

武界乃管涔東出枝遶南者山面南高出諸山

產黃菜

巾字山在縣東北百二十里遞高三里盤踞四十里山

面西南絕頂形似巾字山巖布石如雲滴水如雨名

巾巖瀨雨下有泉一泓禱雨多應宋宣和中建祠封

顯應侯

萬華山在縣東北百三十里汾水東高五里盤踞四十里管涔右劈枝也東至忻州北至堂子村西北至寧武山面南巖下有無梁殿

古洞在縣東北百三十里黃松溝西半巖有洞一巨二小洞門石柱石梁石椽天劃神鏤竈突炕背穿石為之密無縫裂迤東有石泓

新開嶺在縣東北路通忻州

汾河源出寧武縣三馬營管涔山天池下又一源出林

溪山龍眼泉過支鍋石合於寧化南四十里定河

少昊

孫昌寧公所定名定河

南流入縣永安鎮經縣治西半里東南

下婁煩鎮至雁門村入交城盧峪口界水經注汾

水又南與東西溫谿合

當即礮河源石峽山泉也

又南經一城東

憑墉積石側枕汾水俗謂之代城又南出二城間其城角倚翼枕汾流世謂之侯莫干城

社干河在縣南十五里源出嵐縣梅家莊流至縣境王端莊東南入於汾

監河源出縣南百四十里獨石河村流至婁煩鎮南入汾明志鎮西一里東流入汾

狗舐泉在天柱山北魏書爾朱榮高祖羽健居北秀容川曾有狗舐地因而穿之得甘泉故名一名龍泉

羊兒河源出縣西五十里鹿徑嶺下東流至縣西南一里入於汾

碾河發源縣東北百二十里中字山或瀑出巖下或突出地中水甚清潔氣溫不冰十里有奇合懸鐘山馬

寨水經娘娘山下至縣城南半里又西入於汾

嵐河源出嵐縣經流古石門會龍泉川至縣西南六十里汾陽都東北入汾右折入石峽

金龍泉在天柱山半 渥洼泉在周洪山北 巾山泉

在中字山下 獨泉在石樓山上 天城流泉在臨

春山下 桃山泉在桃子山下 湧泉在城東小山

灣 馬跑泉源出下馬城相傳唐太宗遺跡南流入

交城境



代州

勾注山在州西北二十五里一名纍頭山一名牛斗山  
土人名牛頭山山有七峰似斗又名斗山東有勾注  
陁山形勾轉水勢注流故名勾注山其北名勾注塞  
跨朔州南境山有東西陁又名西陁山東陁山上有  
太和崖一名太和嶺寧貞一山也下有白龍池一名  
神仙隘 蘇厲遺趙王書秦反陁分先俞於趙 徐  
廣曰爾雅曰西俞雁門是也正義曰陁音邢分字誤

當作山字括地志云勾注山一名西陘山在代州雁  
門縣西北四十里俞音戍郭注云西陘即雁門山也  
按西先聲相近蓋陘山西陘二山之地竝在代州雁  
門縣皆趙地也 晉句注碑北方之險有盧龍飛狐  
句注為首天下之阻所以分別內外 孫紹先北斗  
山靈應祠記古稱晉多山其南北環抱若天造神為  
之者惟代則然南山拱峙如屏障其北率巍聳雄踞  
如枕如負蜿蜒而西其峰巒突兀壁立峭拔儼然為

一方巨鎮者惟北斗則然山故名纍頭祠在其巔歷  
宋金元薦有封號如所謂順德侯佑順公廣祐靈應  
王者有刻石可考見也 後魏天興四年新興太守  
上言晉昌民賈相昔年二十二為雁門郡吏入勾注  
西陁見一父老曰自今以後四十二年時當大樂子  
孫永長言終老父化為石人相今七十下檢石人見  
存至破慕容寶之歲四十二年

白仁巖在州西北三十里晉釋慧遠建寺巨石上有石

塔峰頭有說法臺定心石棋枰石崖下有五井瀾泊者二其三明列可鑑

雁門山在州北三十五里一名雁門塞兩山對峙雁度其間上有過雁峰特高與應州龍首山相望南口東山麓有鳳凰石形瘦而端立上有鳳爪痕關西有豹突泉一名橫城隘楊六郎試刀石一石中分在州北八里虎跡石在州北二十里喬宇雁門山記午上關折西躡高嶺絕頂四望則繁峙五臺聳其東

寧武諸山帶其西正陽石鼓挺其南朔州馬邑臨邊  
之地在其北 代州勾注塹限內外而夏屋紹宗覆  
宿傳歲雁門卓起八里平穿南則鳳凰諸山與雁門  
對峙其雁門之左則水峪胡峪等山為東壁而交南  
山之峩口雁門之右則白草蓮花接盤道等梁為西  
壁而交南山之蘇林東西四水一面滹沱 郭璞傳  
礪石出雁門山白者如水中赤色 金元好問詩  
盤盤雁門道雪澗深以阻半嶺逢驅車人牛一何苦

山海經雁門之水出於雁門之山雁出其間在高柳北其山重巒疊嶽霞舉雲高連山隱隱東出遼塞其水東南流經高柳縣故城北城在平城東南六七十里於代為西北也以地勢度之非今雁門

纍頭山在雁門廢縣西北六十里即勾注七峰之首也漢志中陵有纍頭水經注濕水出於纍頭山地形志雁門有龍淵神亞澤祠志纍頭山之神能興雲南宋金胥有封號

夏屋山在州東北三十里一名夏壺一名賈屋土人名  
草垛山山側有西戎谷 水經注濕水東北左合夏  
屋山水南出夏屋山之東谿西北流 括地志夏屋  
山一名賈屋山今名賈母山在代州雁門縣東北三  
十五里夏屋與勾注山相接蓋北方之險亦天下之  
阻路所以分別內外也 師古曰賈屋山即史記所  
云趙襄子北登夏屋者 金志雁門有夏屋山雁門  
山滹沱水 山堂肆考夏屋山在山西太原府代州

東昔趙襄子北登夏屋誘代王使厨人操銅斗擊殺之遂有代地 爾雅山中有異獸形如菟相負并行土俗謂之蹶注出夏屋山

鳳游峪在州東十五里一名牛心山

白楊原在州東四十里令狐楚白楊廟記滹水旁注雁門山前峙盤礴相抵為堆為阜翳蒼柯條如虬如龍廣僅百畝厥高又倍信可以回薄日月而逃避風雨豈朔漠之氣凝結於此乎坤元之精決泄於此乎



鹿蹄石在州東四十里澗石上有雙鹿蹄痕石下有鹿蹄澗堡

明月崖在州東五十里崖有石形圓似月

舜山在州東南十五里山上有舜井建舜廟舜子寺

王通山在舜山右距州二十五里以舜名一名龍谷

滴水崖在州東南四十里懸崖高十餘丈崖半一泉綫懸洛洛不少輟

三臺山在州東南四十四里三峰

龍門在州東南五十里兩山對峙

圭峰山在州東南五十里本豐而末擡象圭之終葵山  
下明月巖象月盈東澗有峰半巔石竅洞開為名穿  
心洞俛入洞口輒高朗可容數十百人宋季夏丞相  
姪吉祥避元兵於此

東峩峪在州東南五十里兩山牆立殆數千仞

香爐山在州南二十里四角稜起儼似高爨

鳳凰山在州南三十里有天桂玉女玉案會仙養龍五

峰東南十里有青龍門觀旁有洗參飲虎二池桃花水簾丹砂藏劍諸洞相傳孫真人鍊丹地又傳隋仁壽二年鳳凰見此上建來儀觀名山為嘉瑞山

西峩峪在州西南十里一名荆山

紫荆山在州西南二十五里峰形似筆架

殺子谷在州東北二十里赤土溝北相傳扶蘇死此中有恨斯水唐胡曾殺子谷詩至今谷口泉鳴咽猶似秦人恨李斯

金史地理卷之二十一  
卷二十六  
覆宿山在州東北三十五里自夏屋山入州界斷而復起雁門落腰鋪山穿南口八里莊入平原形圓似星一名饅頭一名牛心一名伏牛州主山也

胡峪山在州東北四十五里峪口有脫甲石似甲掛痕陽岐山在州東北五十里

滹沱河在州南二里繇繁峙流入州境 沉沙浴泥沁代城南而西環繞如帶流三里合三里河水又十里有奇合羊頭神河水又數里合九龍河暨西峩河水

又西南流入崞縣界 山海經液女之水出於其陽  
又以辣辣繫之

東關河在州東半里原出雁門山繞城東南入於滹沱  
栢谷泉在東門外南流入滹沱

藍水泉在東門外味鹹

高泉在州東南三十五里後涸

龍霧泉在州東南四十里

谷口河在州東南五十里發源五臺楊林嶺流經縣境

谷口村民多引溉田

西泉在圭峰山西澗中合西莪河入滹沱 澗中有石  
正方而崇似翠屏高百尺水由上瀉似垂珠伏石根  
下行數武由石竇中湧出出澗口又伏行石雷間又  
百武出趾下響似撥琴

洗參池在鳳凰山下相傳仙人洗藥於此

三里河在州西南三里經西關南入滹沱

西莪河在州西南十里源出荆山北流入滹沱

陽明堡東西河在州西南二十里源黃黑二龍池一名  
飲虎池

柳村河在州西七里上田都 通志名七里河經七里  
堡入滹沱

馬站河在州西十里

羊頭神河二在州西二十里一源茹解都黑龍池名東  
河一源茹解都黃龍池名西河又滙龍祠池上池水  
胥南流入滹沱

龍躍泉在州西北二十五里平地沸湧以巨石投之輒噴出舊傳潛通燕京之天池

九龍河在西北三十五里南流入滹沱

金波泉在城北隅即八角井也水甚甘釀酒號金波

豹突泉在州北三十里雁門關西門外水源猛奮突出

北流入桑乾河

飲虎池在州北

恨斯水源出殺子谷



玉液井水甘 星聚泉 益美泉 澄玉泉 胥在城內

五臺縣

五臺山在縣東北百二十里環五百餘里上有五峰巔  
胥積土象臺文殊師利現光地 大華嚴經東北方  
有處名清涼山從昔已來諸菩薩衆於中止住現有  
菩薩名文殊師利與其眷屬諸菩薩衆一萬人俱常  
在其中講演說法 寶藏陀羅尼經佛告金剛密跡  
王言我滅度後於南瞻部洲東北方有國名大震那

其中有山名曰五頂文殊童子游行居住為諸衆生於中說法及有無量天龍八部圍繞供養 文殊般

泥洹經佛告跋陀羅此文殊師利以大慈悲生此國

名羅聚落

即舍衛國

梵德婆羅門家其生之時家內屋宅

化如蓮花從母右脇而生身紫金色墮地能言如天

童子有七寶蓋罩覆其上 唐趙州從諗禪師九游

五臺到輒經夏而返 一日束裝有僧作偈留之曰是

處青山是道場何須策杖禮清涼雲中縱有金毛現

正眼觀時非吉祥師負囊便行自此道化普被幽晉

間又有臺山路薦直去公案

五臺遺事殊夥獨錄大華嚴經寶藏陀羅尼經

文殊般泥洹經及趙州語錄二則以其為禪家深密諦也

明釋德寶號笑巖北京

人也嘗賦清涼山證道歌序曰予登清涼冬觀五頂如銀即知菩薩示剝白淨露之真體下都千峰似錦即知菩薩彰圓融具德之妙行此二不二體用一如

用心及此忽然念斷心境兩忘共曼殊大士於石火

光中共一見耳

清涼詩云文殊彫獨登笑巖歌於山志者以其開龍池天童天隱之先能

復振臨濟宗風也故前有趙州州法苑珠林東有離岳  
後有笑巖乃復見清涼真面目

火珠西有麗農瑤室南有洞光珠樹北有玉澗瓊枝

中峰有自明之金環光之壁 感通傳道宣律師嘗

問諸天佛法來此之始及域內聖道場處天名元暢

者答曰周穆王時已有聲教及此清涼山曼殊所居

穆王於中建廟祀之 李邕五臺山清涼寺碑在炎

漢時卜中箭嶺用肇造我清涼寺

按此則中箭嶺乃五臺之主山也

中臺高三十九里頂周五里一名翠巖峰肩接西北二

臺有五溪發源二溪左注清河三溪右由西臺下出  
我口入游沱臺有靈鷲峰今名菩薩頂

聖祖仁皇帝御製匾額六一曰五臺聖境一曰珠林花雨

一曰靈峰勝境一曰斗室一曰翠巖一曰古雪 甘

露泉在峰右 大寶塔在靈鷲前明慈聖后重建

佛足碑在大塔右釋迦遺雙足跡玄奘自西域圖寫  
持歸唐太宗勅令刻石 文殊髮塔在大塔東拓跋  
魏時有貧女施髮建塔供養明萬曆時掘得數絡其

色如金 雜花園在大塔前 鳳林谷在臺東南有

臥虎石 西天洞在鳳林谷北嶺 梵仙山在東三

十里有殊象寺西有井溝山下有般若泉 楊栢峪

在井溝南 九龍岡在臺南近竹林寺下有楊令公

塔 竹林舍利塔在竹林寺前 清涼谷南四十里

谷中有古清涼寺 清涼石在清涼谷嶺西厚六尺

五寸圍四丈七尺面平正有螺紋能容衆不為隘

聖祖仁皇帝御製匾額二一曰水晶域一曰心會真如

清涼泉在谷北巖清涼寺東 羅漢洞在清涼寺北

清涼橋在臺南溪上 萬年冰在東麓

聖祖仁皇帝御製匾額曰淨域 寒山石在東南三里

玉花池在東南三里三泉入焉隋時池生白蓮堅瑩似玉七日乃萎代牧因建玉花寺

聖祖仁皇帝御製匾額曰天開淥池 伽藍溝在臺西北

萬聖澡浴池在中北二臺間一名湧泉相傳文殊盥掌地遊人多拭巾投之後浚鑿構亭清涼之谷澡

浴之地跳珠噴玉乃醒心地也

聖祖仁皇帝御製匾額曰無垢 太華池在臺上西北隅

禱雨輒應 三珠泉在東南麓玉花寺旁其沸如珠

距百武有七寶珠樹高二丈下為一榦歧分七條上

復拱合為一見喬宇記 文殊浴池在臺西足印宛

肖王道行詩泠然止水清人意常湧文殊脚下金

舍利塔 獅子窩俱在臺西南嶺山中圓光時現亦

時有金蓮鉢囊熟棉花之瑞 柳宗元送文暢登五



臺序云代間有靈山焉與竺乾鷲嶺角立相應 孔  
天孕秋崖詩序代北之山有曰五臺者名山也聞此  
中時有金銀氣或寶鏹攝光於雲嵐之隄或金燈放  
彩於雨雪之霄或見弱翁牽狗老嫗抱兒轉眼又復  
不見臺盤石上約可建五丈旗及其登也聚之千人  
不為多散之百人不為少凡此亦甚奇矣 劉繼顯  
於五臺栢谷置銀冶取鏹烹銀北漢即其治建寶興  
軍 遼統和十年九月癸卯幸五臺山金河寺飯僧

宋太平興國四年於五臺置銀冶後廢 宋初日

本僧奮然來朝遊五臺山歸國有謝表載宋史景德  
四年回鶻落紇遣尼法仙等來朝許遊五臺山 金  
元好問有臺山雜詠十六首 清涼嶺明一統志在

縣東北百里東竹林嶺東南有南臺嶺西有清涼石

清涼泉清涼洞

今之清涼嶺即漢之中箭嶺也

東臺高三十八里頂周三里東望明霞如鏡即大海也  
一名望海峰東溪之水北注滹沱東南四十里入阜

平縣界西北二十里入繁峙縣界臺有那羅延窟

臺東

畔洞可容人風寒盛夏有冰五色光時由洞中出紫栢詩那羅延窟甚深密底裏空明不可測

笠子

塔在臺頂 觀音坪在北麓一里 古華巖谷在臺

西北華巖嶺上有法雲寺谷內有碧山寺平章寺報

恩寺金界寺 棗林在臺東北 五王城在臺東北

天城在五王城側 大會谷在臺東山勢似蟠龍

衆溪交滙滹沱源出此 華林在東南二十里 温

泉在東南五十里有温泉寺 馬跑泉在東南六十

里 舊路嶺在東南五十里 鐵舖在南五十里

棲賢谷在西南溝有淨土庵巖畔有滴泉味甘 觀

音洞在棲賢谷畔滴泉 化竹林在西南支山二十

里 青峰在化竹林南 現聖臺在青峰南 石佛

嶺在池南二十里 漫空石在臺頂 研伽羅山

紫府

趙無恤獵常山  
西占紫雲之瑞

黃巍嶺

樓觀谷在那羅延

窟東內有習觀崖 明月泉在臺西南山中相傳以

紗帛障目下視輒見月在水中有觀海寺 毒龍池

龍常害物四十里內人畜不敢近唐釋誠慧攜淨瓶  
錫杖廬其側咒之龍入瓶七日乘風雲而去 胡嶠  
記石關路崖狹一夫可以當百此控扼契丹之險也  
又三日至可汗州南望五臺山其一峰最高者東臺  
也又三日至新武州

南臺高三十里頂周一里又南二里有古南臺

聖祖仁皇帝御書古南臺三字匾額 仙花山在南麓

錦繡峰即南臺也臺當山陽地差曠金葉日菊佛鉢

花周崖燦發似錦繡故名 普賢塔在石城南二十

里

慈山詩石裂峭崖天作障寺居空界石為鄰

白龍池在東南麓 插箭

嶺在東二十里宋太宗北征插箭 萬木坪在西南

四十里 龍宮聖堆近娑婆寺 聖鐘山南八十里

滴水崖南七十里 古竹林西南三十里有小如

來像 虎陽嶺西南三十餘里虎陽河源此 志公

洞在清涼石南 法華洞在志公洞前 七佛洞西

南二十里 金閣嶺在臺西北 天盆谷在金閣嶺

左有天盆寺日照寺 宰殺溝在金閣嶺下 蛇溝  
在天盆北土人名車溝明釋寶印棲此有龍樹庵  
海螺城在天盆東 九龍岡在南臺西 千佛洞在  
臺東北崖畔

聖祖仁皇帝御製匾額曰禪悅

西臺高三十五里頂周二里一名掛月峰上有泉四十  
里至繁峙縣界臺有魏文帝人馬跡

聖祖仁皇帝御製匾額二一日蓮井一日初地 八功德

水在臺北

聖祖仁皇帝御製匾額曰宵潤 二聖對談石 獅子踪  
在對談石下 牛心石在臺東 文殊洗鉢池在臺  
東北又有泥齋僧習定處 烏門在西北隅 龍窟  
在西麓 石門在西南谷 李牛谷在西北三十里  
禪堂溝在臺西北 莪谷在西五十里 秘魔巖  
在西四十里 天晦有風雨聲下有龍洞 唐秘魔和尚  
受法印於江西馬祖居巖下因以為號 常持木叉後



化於此僧業方亦翹足化巖下 薩埵崖在秘魔巖

西 香山在中西二臺間

北臺高四十里頂周四里一名叶斗峰麓有七風雲雷

電惟出半麓雲氣瀰漫旋覆四十里衆溪發源至繁

峙川前入清河臺有黑龍池即天井說法臺在臺東 鄧

隱峰塔在臺頂 生陷獄在後麓以繁峙張愛名

羅漢臺在臺東 華嚴嶺東南二臺間 樓觀谷在

東南二十里 金剛窟在樓觀谷左崖唐永淳二年

佛陀波利持佛頂尊勝陀羅尼經梵本徃來五臺入  
金剛窟不復出一名萬仙山唐鄧隱峰於馬祖言下  
契悟入五臺窟倒立而化 白水池在樓觀谷後與  
天井連水流經莪谷口入滹 五郎祠在樓觀谷西  
玉泉 紫霞谷俱在臺南清涼最深處也明嘉靖  
甲子釋無邊掘地得銅鉢受斗餘遂成叢林即以大  
益名陸莊簡光祖常留玉帶於谷之妙德庵 龍門  
在南麓下有留雲北有藏雲谷側有金沙泉 仙人

庵在後麓 九女泉在臺後七里 藏真谷在臺西  
北 大黃尖在北二十里即古北臺 卓錫泉在蘭  
若寺 愁山 文岫山俱在西北四十里有黎峪寺  
寶陀山在北四十里一名寶山產銀石碌又產天  
花菜 北臺最高至者多阻風 古志以大黃尖為  
北臺叶斗峰為中臺翠巖峰為南臺後以錦繡峰靈  
瑞時現且與四峰鼎立故定為南臺則翠岩居中叶  
斗為北矣况大黃尖乃叶斗支山擬之叶斗殆培塿

然固不足以當五峰之列藍谷傳以中臺高於北臺則誤指古北臺也北臺後有古木百章釋惠湛得法荷澤入處其中止靜輒三日乃起木又曰汝在生死穴中耽着何時是了湛條大徹後人名其樹曰生死藥

楊白峪在五臺山有靈峰寺

天蓬山在縣東十五里

虎陽嶺在縣東三十五里

太師山在縣東四十里

天和山在縣東四十里有龍洞泉

東明山在縣東四十里山半一孔望縣西月掛山

鐵拐山在縣東五十里削壁千仞中插二拐石上詩云

一川流水漫何以促征桴空插山頭拐舟人但仰呼  
烏牛山在縣東八十里

暖泉山在縣東南四十里下有泉恒溫

仙人山在縣東南五十里石巖上有人坐跡山腹石有

手跡山下石有雙足跡背西面立

黑山在縣東南九十里五臺平山界也

寶髻山在縣南十里有香爐峰真潛洞避雨巖出碧陽砂巖上石棋盤土人云仙人奕於此

南神壇在縣南十里宋孫儼南神廟碑邑南十里有山層巒聳峙喬松茂翳上有古祠俗謂之南神壇蓋漢文帝祠也

抓髻山在縣南十五里兩峰似髻

莎泉山在縣南十五里有莎泉寺

鳳臺山在縣南十里東西兩山相接低昂起伏似鳳盤

翥

筆架山在縣南二十里三峰高拔

栢嶺山在縣南二十五里

突兀山在縣南四十里一峰出雲上建老君祠山巔題

刻云突兀峰

五洞山在縣南四十里

段畝山在縣南四十里一名文山產紫綠紋石可作硯  
簡子山在縣南四十里有趙簡子廟

聖鐘山在南臺南八十里連南臺上有仙寺嶺三賢崖  
聖僧崖習觀巖青峰寶陀峰勝跡二十有二

圍堰山在縣西南二里將雨雲輒生

紫羅山在縣西南八里巒高松茂元好問明陽觀碑臺  
州西南八里紫羅山之麓有保聚曰明陽

西我嶺在縣西南七十里



蘆虎山在縣西十五里形似伏虎

月掛山在西山上一孔玲瓏似月

峰山在縣西北二里環城三面有黑風洞下為九女泉

青山在縣西北十里有古賢士居

玉皇壩在縣北三里上有玉皇廟

龍泉山在縣北五里有龍泉

錦屏山在縣北二十五里崇壁疊巒卉樹五色

九女山在縣北四十里有仙巖

象山在縣北五十里多松

閣嶺山在縣東北十里入清涼道也跨山為道跨道為閣雲旋閣下輒雨漢名白雲山

獨龍山在縣東北四十里山半有泉殊清甘下為龍池莊

二仙山在縣東北四十里小竇村南巖間二石遠望如人一坐一立東半里為紅崖迤東為太師堽下則龍灣

蓮花山在東北六十里古竹林寺後山也

鐵勒山在東北六十里臺西南六十里

東峩嶺在縣東北八十五里

射虎川在縣東北百三十里穆爾賽碑記

上御極二十有二載春二月四巡五臺畢事而旋由菩薩  
頂遵長城嶺西十乘萬騎雷鞠雲奔道旁林莽薈翳  
有虎伏其間衆莫敢禦

上親挽繁弱一發而殪之臣穆爾賽等請賜嘉名以垂永

久

詔從所請名曰射虎川

華崖嶺在縣東北百六十里一名華巖

黃石山

仙跡山有一足跡

石版山有二泉

皮箱崖崖腹懸皮箱有珠書十六字人莫能識崖腹皮箱不可攀及有題壁詩云一索懸方筭人傳中有書

千年容易過何日發瓊琚

硃砂崖赤色

審戶崖行者捫壁形似審戶然

栢谷唐志栢谷有銅有錫有鐵

紗帽山形似

金鷄嶺王道行詩行過金鷄嶺非復人間世

滹沱河繇崞縣東流至河邊村入縣境至南河門合盧

虎陽清水三河

茹湖在縣東十五里環茹村川皆山水聚為湖四面距山方四里水草布涯春秋雁多集此水溫漢名文海龍灣泉在縣東四十里太師山下大泉二曰龍池小泉近百長松數千株覆泉虎水繞三面

沙沛泉在南門外味似釀

石窟南五十里河門虎水清水將滙滹沱水冲山而出山闢兩崖壁立萬仞崖半穴距水一丈徑一尺清明前三日魚躍出寢至盈穴晝夜不輟者五六日乃止

居民接筐篋其下恒獲數千頭魚瘠而甚肉衰不盈尺云

建安潭在縣西南三十里有魚

聖阜水在縣西南四十里水側石上有二手跡一足跡泉巖河一名泉崖在縣西三十里源出泉巖村至槐陰合滹沱

孤嶼溝在縣西兩山對峙寬裁數武澗深五六丈細泉循澗而出鑿山開道以通往來

九女泉在西北峰山下水温流合盧虎河

盧虎河一名慮虎源出縣西北十五里王村流環縣東南又名縣河入南峪合虎陽清水二河入滹沱 金

志有五臺慮虎 五臺舊曰慮虎久廢後魏置驢

夷隋大業初又改五臺則慮虎之名舊矣

臥虎泉即盧虎河源

龍泉在縣北五里

虎陽河在縣東北四十里發源平地入獨擔山峽口經



東明山下至河口合清水河

清水河源出東北百六十里華巖嶺西南流經飯仙山下至石嘴合射虎川虎陽河盧虎水入滹沱

龍池在獨龍山下距池一丈有石罅清泉出焉禱雨多應

神武泉在射虎川穆爾賽碑記

上西巡清涼遵長城嶺而旋親挽繁弱一發殪虎臣某等方將修除荒蕪忽有清泉湧出林莽甘冽澍泓經冬

不竭

東峪河發源移城村經孫家莊百蘭村至河門合滹沱  
谷口河源出楊村嶺西流至代州谷口村

塔兒溝在五臺山有雜華庵

東峪溝由黑山關至城百里澗繞山行殊盤曲

野馬溝自探頭至滹沱七十里

石盆溝自茹村至東河口三十里

石槽溝自河東口至城南四十里

油盆池黑山下深不可測龍時見小身禱雨多應

石蓮池池石胥象蓮花

魚洞泉在河口村南穀雨日盈尺魚出數頭則歲主稔  
馬跑泉在探頭村前

濟難泉在避事壩上

繁峙縣

秦戲山在縣東北百三十里一名孤山明一統志俗名  
小孤 五臺山志北臺東七十里 吳黃省曾獸經

山海經曰秦戲之山有獸焉其狀如羊一角一目目在耳後其名曰羴羴

慙山在縣東八十里峻聳崎嶇陟此難辨正方

華巖山在縣東九十里

公主山在縣東南二十里相傳拓跋氏女東北邊石有手足跡

小五臺山在縣東南二十里

寶山在縣東南九十里山有南冶谷路通山東古有礦

砂

靜明山在縣南十里一名端橫嶺內有仙人石洞一作淨明山上有淨明寺

圭峰山在縣西南五十里內有滴水崖仙人掌

巖頭山在縣西南六十里延袤八百餘里南連太行石崖巉巖此為其首有龍洞

大孤山在縣西北五十里秦戲山近法池口三峰孤峙於平川之內其東又有小孤山

茹越山在縣北二十里有谷路通大同越翟畋上此山  
元兵獲之恨奮吞茹

鐵脚山在縣北三十里有蕭太后梳洗樓

龍山在縣東北六十里

沒淚山在縣東北九十里土人傳蕭太后哭而沒淚  
平地嶺在茹越東北百餘里

唐山五朝志雁門郡繁峙有長城滹沱水派水唐山

鉞山穆天子傳庚辰至於鉞山之下癸未雨雪獵於鉞

山之西阿於是得絕鉞山之隊北循滹沱之陽是鉞山當隸雁門關東隘諸山也

滹沱河在縣東百三十里源出東北秦戲山流甚微涓涓如瀉壺色青黑列如品字名三泉西南流三里至故福都合玉斗泉一名青龍泉西流數里名三泉都之三泉其泉亦列如品字又西流至砂澗東合北樓口水又西流至新興村合華巖嶺水經縣城南西入代州界又經崞縣五臺忻州定襄孟縣入直隸正定

府平山縣界 禮記晉人將有事於河必先有事於

惡池疏先告從祀者然後祭河也

惡當為呼聲之誤

陳皓曰

惡池并州川之大者河之從祀也 任布知正定府

築甬道屬滹沱河跨絕泥淖 通典虘池發源在今

雁門郡繁峙縣界

通考

繁峙有虘池河源出縣東南

派阜山 漢志代郡鹵城縣虘池河東至參合入滹

沱別并州川從河東至文安入海過郡六行十三百

七十里 顏師古注滹沱出鹵城 章懷注山海經



云秦戲之山滹沱之水出焉在今代州繁峙縣東流  
經定州深澤縣東南即光武所度處今俗猶謂之危  
度口臣賢按呼沱河舊在饒陽南至魏太祖曹操因  
饒河故瀆決令北注新溝水所以今在饒陽縣北  
元和志滹沱水出代州繁峙縣秦戲山西南流逕唐  
林縣東又西南逕崞縣東又西南逕秀容縣東東轉  
逕定襄縣北又東逕五臺縣西南又東逕孟縣北  
薛士龍曰衛水東北合滹沱河過信安軍入易水

元志泰定四年八月都水監廉訪司正定路及瀕河  
州縣洎耆老會議言滹沱河其源自五臺諸山來至  
平山縣王母村山口下與平定州娘子廟石泉治河  
合夏秋霖雨水漲瀰漫城郭每年勞民築堤莫能除  
害宜自王子村辛安村鑿河長四里餘接魯家灣舊  
澗復開二百餘步令入治河可以分殺其勢 石珪  
泛滹沱河賦出自繁峙經於代谷放乎雁門之坂帶  
於太行之麓朔方巨嶽實扼其胸恒衛諸流半入其

腹氣吞萬壑激硤礪而未平勢應三泉墮平原而逾  
感

品字泉在秦戲山即滹沱源西流由北臺之陰注達正  
定 明喬宇滹沱源記自王莊驛西行五十里道瓶  
形關飲孤山村下村以小孤山而名即山海經所載  
秦戲之山滹沱之水出焉者村之西是有三泉鼎開  
相去僅五十步皆幅員尺許瀟湧正出浮清泄瀾皎  
然不污故得保其明潔趨繁經代達於平山會於常

山為黃潦之流而歸於海泉之最顯於晉者以此  
黑龍池在東南九十里西流三十里入巖頭河經海子  
諸村流合滹沱

華巖嶺水在縣東南百里西北入滹沱

太華池在縣東南百里深不可測禱雨多應水入滹沱  
明景泰時嘗勅祭焉

我河在縣西二十里河出黑龍池經崖頭諸村出於山  
口我口在西岸溝子在東岸

龍池在縣北鐵脚嶺下

派水

崞縣

崞山在縣西南二十五里漢以山名縣連峰疊嶂上左  
有崞山神廟廟左有甘露池地最燥民禱雨置瓶池  
中瓶滴甘露輒雨 後魏高宗興安二年五月乙酉  
行幸崞山 太安三年正月壬戌畋於崞山 和平  
三年二月畋於崞山遂觀漁於旋鴻池 太平真君

二年三月辛卯葬惠太后於崞山從后意也別立后  
寢廟於崞山建碑頌德 世祖田於崞山有虎突出  
長樂侯穆顛搏而獲之世祖歎曰詩所謂有力如虎  
顛乃過之 太平真君三年冬襄城孝王盧魯元卒  
葬於崞山為建碑闕自魏興貴臣恩寵無與為比

宋張忱崞山廟記崞縣據崞山縣因山得名予嘗周  
覽四顧其崇巖弘嶺連峰疊嶂四隅環合列岫森然  
周圍拱抱若城郭狀謂之崞山不亦宜乎是山以西

北為主而峻極最高若城之馬面狀俗因以馮頭山呼之舊有神廟居山之陽耆艾傳語云起邑之時有神兵夜助築每出入神廟西北坡實崢山之西南麓也迄今名曰鬼兒坪可謂有功於國矣

五峰山在縣東二十五里橫亘二十餘里五峰高聳根巨末銳似犀角然俯臨滹沱似人伏首而臥巔有文殊堂有龍神廟天涯為天涯五峰為地角

凭牛山在縣東南三十里有神池六畜飲水病輒愈

宋真宗嘗封山神志稱通聖郎君土人稱牛羊將軍  
山因以名

天涯山在縣東南四十里峭石壁立形似芙蓉土人名  
蓮花峰山氣溫和雪下輒消麓有石鼓建石鼓神祠  
地形志秀容有石鼓山神 金志崞有崞山石鼓  
山滹沱河沙河 紇豆陵步藩至樂平郡齊獻武王  
與爾朱兆破之斬步藩於秀容之石鼓山其衆退走  
唐雍陶詩十年馬足行多少兩度天涯地角來



金元好問詩九州上游推大鹵獨恨山形頗稚魯天  
涯一峰今日看快似昂頭出環堵

迴光嶺在縣東南五十里相傳五臺五色雲至此復迴  
其說近幻

福壽山在縣東南七十里下有溫泉山左即石鼓山

明李楠詩自是羣山第一山羣山擁翠水圍環更奇  
一竅通幽窅不獨峰巒可解顏

將軍山在縣東南七十里上有神廟廟前石上有馬蹄

跡

逆草坡在縣東南百里銅川相傳鳥食母山為之赤草  
枝葉倒垂色胥紅云

堯天山在縣東南一百七里龍尾山西十里上有堯祠  
山後有神池旱禱輒應距縣百三十里

龍尾山在縣東南一百十里鳳凰山西三里石類珠少  
紫上有池旱取水禱雨輒應

鳳凰山在縣東南百二十里石類鳳毛及松紋可作硯

雙山在縣南四十里上有寨

前高山在縣西南四十里崞山之西南峰也距崞巔十

五里

陽武峪在縣西南四十里 宋左拾遺張齊賢疏自河

東初下臣知忻州捕得遼納米典吏皆云自山後轉  
般以授河東以臣料遼能自備軍食則於太原非不  
盡力然終為我有者力不足也河東初平人心未固  
嵐憲忻代未有軍砦入寇則田牧頓失擾邊則守備

可虞及國家守要害增壁壘左控右扼疆事甚嚴恩  
信已行民心已定乃於雁門陽武谷來爭小利此其  
智力可料而知也

滴水崖在縣西南四十里懸崖數十丈一泓長滴

烈女崖在縣西南五十里以要氏二女投崖名詳列女  
志

太子崖在縣西南六十里以扶蘇名一名殺子谷 史

記蒙毅禱雨山川還繫於代代州扶蘇蒙恬諸蹟當

改蒙毅恨斯殺子當入上郡陽周今延安府

黃嵬山在縣西南七十里跨寧化界遼疆界石長城

去宗熙寧七年爭黃嵬山界三十餘里

正陽山在縣西南九十里巔有玉皇殿

六盤嶺在縣西南百里

南坡在縣西南百二十里松蘿蔚翠

栢枝山在縣西二十五里石紋類栢枝陸壽光詩怪石

深藏萬栢文

石佛峪在縣西三十里

白仁巖在縣西北四十里 弋謙白仁巖寺記代郡西

行三十餘里抵茹山自茹山逕入又西行五里許而

抵崞其上有巖名曰白仁巖有寺名曰白仁巖禪寺

實晉浮屠氏遠公之肇造也

舊志入代今按碑記屬崞故兩存之

仙洞在縣北十里有三門洞中土堅色赤氣溫

無京山五朝志崞有無京山崞山有土城

滹沱河在縣東一里源出繁峙孤山之陽西流至忻口

復折而東 繇代州西南流入縣境繞城之東環抱  
城合來宣普濟二河水又數里合陽武河水水益鉅  
又六十里合板市河水自蝦蟆石東折而過忻口

溫泉在福壽山下

南橋河在南郭門外東流入滹沱

陽武河在縣南二十里源出太子崖東流至雙陵村入  
滹沱 滹沱陽武兩河東西旋繞縈迴若帶 辣產

於陽武河俗謂之構子後見則歲必豐又見五臺谷

口河

沙河在縣南六十里東流入滹沱即金志沙河  
銅河在縣南七十里源出福壽山東流入滹沱

三泉在縣西南五十里東流入滹沱 相傳漢高帝駐  
師鎗搗地而三穴出水

瀑布泉在縣西南六十五里巖有石人足下出泉

蟾酥池在縣西北五里嘗出蟾酥

龍泉在縣西北三十里龍泉都左有魏鄭公祠相傳唐



魏徵率兵宿此嘗祝天以劍插地獲泉其源有二北  
曰上龍泉南曰下龍泉分三派合入滹沱


北橋河在北城門外東流入滹沱

板橋河在縣北二十五里東流入滹沱

甘露池在崞山神廟左歲旱置瓶池中瓶上露滴其味  
甘

白水遺山隱元好問朝元觀記崞山軍節度閻侯德剛  
經畫略定境內休息頗與方外士周旋所居衛邸里

白水出焉侯愛其景氣古澹有終焉之志因以清爽  
自號幅巾便服香火晨夕



山西通志卷二十六